

卷一 內篇諫上

莊公矜勇力不顧行義晏子諫第一

莊公奮乎勇力，不顧于行。義勇力之士，無忌于國，貴賤不薦善，逼邇不引過，故晏子見公。公曰：「古者亦有徒以勇力立于世者乎？」晏子對曰：「嬰聞之，輕死以行禮謂之勇，誅暴不避彊謂之力。故勇力之立也，以行其禮義也。……昔夏之衰也，有推侈、大戲，殷之衰也，有費仲、惡來，足走千里，手裂兕虎，任之以力，凌轢天下，威戮無罪，崇尚勇力，不顧義理，是以桀紂以滅，殷夏以衰。今公自奮乎勇力，不顧乎行。義勇力之士，無忌于國，身立威強，行本淫暴，貴戚不薦善，逼邇不引過，反聖王之德，而循滅君之行，用此存者，嬰未聞有也。」
(1/5a-6a)

《太平御覽·人事部二十七·健》：「昔夏之衰也，有推侈、大戲，殷之衰也，有費仲、惡來，足走千里，手制兕虎。」(386/6a)

《太平御覽·人事部七十七·勇四》：「昔夏之衰也，有推移、大戲，殷之衰也，有費仲、惡來，足走千里，手裂兕虎，任之以力，凌轢天威，專行勇力，不顧乎義理，是以桀紂以滅，殷夏以衰。」(436/6a)又：「莊公奮乎勇力，不顧於行。尚勇力之士，無忌於國；貴戚不薦善，逼邇不引過，故晏子見公。公曰：『古者亦有徒以勇力立於世者乎？』晏子對曰：『嬰聞之，輕死以行理謂之勇，誅暴不避強謂之力。故勇力之立也，以行理義也。今公自奮乎勇力，不顧乎行暴，尚勇力之士，無忌於國，身立威疆，行流淫暴，貴戚不薦善，逼邇不引過，反聖王之德，而脩滅君之行，用此存者，嬰未嘗聞有也。』」
(436/6a-b)

景公飲酒醒三日而後發晏子諫第三

景公飲酒，醒，三日而後發。晏子見曰：「君病酒乎？」公曰：「然。」晏子曰：「古之飲酒也，足以通氣合好而已矣。……」（1/7a）

《北堂書鈔·酒食部七·酒》：「景公飲酒，醒，三日而後發。晏子曰：『古之飲酒也，足以通氣合好而已。』」（148/8a）

景公燕賞無功而罪有司晏子諫第七

景公燕賞于國內，萬鍾者三，千鍾者五，令三出，而職計莫之從。公怒，令免職計，令三出，而士師莫之從。公不說。晏子見，公謂晏子曰：「寡人聞君國者，愛人則能利之，惡人則能疏之。今寡人愛人不能利，惡人不能疏，失君道矣。」晏子曰：「嬰聞之，君正臣從謂之順，君僻臣從謂之逆。今君賞讒諛之民，而令吏必從，則是使君失其道，臣失其守也。先王之立愛，以勸善也，其立惡，以禁暴也。昔者三代之興也，利于國者愛之，害于國者惡之，故明所愛而賢良眾，明所惡而邪僻滅，是以天下治平，百姓和集。及其衰也，行安簡易，身安逸樂，順于己者愛之，逆于己者惡之，故明所愛而邪僻繁，明所惡而賢良滅，離散百姓，危覆社稷。君上不度聖王之興，而下不觀惰君之衰，臣懼君之逆政之行，有司不敢爭，以覆社稷，危宗廟。」公曰：「寡人不知也，請從士師之策。」（1/10a-11a）

《群書治要》：「景公燕賞於國內，萬鍾者三，千鍾者五，命三出而職計筴之。公怒，令之免職計，命三出，而士師筴之。公不悅。晏子見，公謂晏子曰：『寡人聞君國者，愛人則能利之，惡人則能疏之。今寡人愛人不能利，惡人不能疏，失君道矣。』晏子曰：『嬰聞之，君正臣從謂之順，君僻臣從謂之逆。今君賞讒諛之臣，而令吏必從，則是使君失其道，臣失其守也。先王之立愛，以親善也，其去惡，以禁暴也。昔者三代之興也，利於國者愛之，害於國者惡之，故明所愛而賢良眾，明所惡而邪僻滅，是以天下平治，百姓和集。及其衰也，行安簡易，身安逸樂，順於己者愛之，逆於己者惡之，故明所愛而邪僻繁，明所惡而賢良滅，離散百姓，危覆社稷。君上不度聖王之興，而下不觀惰君之衰，逆政之行，有司不敢爭，以覆社稷，危宗廟矣。』公曰：『寡人不知也，請從士師」

之筴。』」（33/143-45）

景公欲廢適子陽生而立荼晏子諫第十一

淳于人納女于景公，生孺子荼，景公愛之。諸臣謀欲廢公子陽生而立荼，公以告晏子。

晏子曰：「不可。夫以賤匹貴，國之害也；置大立少，亂之本也。夫陽生而長國人戴之，君其勿易！夫服位有等，故賤不陵貴；立子有禮，故孽不亂宗。願君教荼以禮而勿陷于邪，導之以義而勿湛于利。長少行其道，宗孽得其倫。夫陽生敢毋使荼饜梁肉之味，玩金石之聲，而有患乎？廢長立少，不可以教下；尊孽卑宗，不可以利所愛。長少無等，宗孽無別，是設賊樹姦之本也。君其圖之！古之明君，非不知繁樂也，以為樂淫則哀，非不知立愛也，以義失則憂。是故制樂以節，立子以道。若夫恃讒諛以事君者，不足以責信。今君用讒人之謀，聽亂夫之言也，廢長立少；臣恐後人之有因君之過以資其邪，廢少而立長以成其利者。君其圖之！」公不聽。景公沒，田氏殺君荼，立陽生；殺陽生，立簡公；殺簡公而取齊國。（1/13b-14b）

《群書治要》：「淳于人納女於景公，生孺子荼，景公愛之。諸臣謀欲廢公子陽生而立荼，公以告晏子。晏子：『不可。夫以賤匹貴，國之害也；置子立少，亂之本也。夫陽生長而國人戴之，君其勿易！夫服位有等，故賤不陵貴；立子有禮，故孽不亂宗。廢長立少，不可以教下；尊孽卑宗，不可以利所愛。長少無等，宗孽無別，是設賊樹之本也。君其圖之！古之明君，非不知繁樂也，以為樂淫則哀，非不知立愛也，以為義失而憂。是故制樂以節，立子以道。若夫恃讒諛以事君者，不足以責信。今君用讒人之謀，亂夫之言，廢長立少；臣恐後人之有因君之過以資其邪，廢少而立長以成其利者。君其圖之！』公不聽。景公沒，田氏殺荼，立陽生；殺陽生，立簡公；殺簡公而取齊國。」（33/141-43）

景公怒封人祝之不遜晏子諫第十三

景公游于麥丘，問其封人曰：「年幾何矣？」對曰：「鄙人之年八十五矣。」公曰：「壽哉！子其祝我。」封人曰：「使君之年長于胡，宜國家。」公曰：「善哉！子其復之。」曰：「使君之嗣，壽皆若鄙臣之年。」公曰：「善哉！子其復之。」

封人曰：「使君無得罪于民。」公曰：「誠有鄙民得罪于君則可，安有君得罪于民者乎？」晏子諫曰：「君過矣！彼疏者有罪，威者治之，賤者有罪，貴者治之；君得罪于民，誰將治之？敢問：桀紂，君誅乎？民誅乎？」公曰：「寡人固也。」于是賜封人麥丘以為邑。（1/16a-b）

《群書治要》：「景公游於麥丘，問其封人曰：『年幾何？』對曰：『鄙人之年八十五矣。』公曰：『壽哉！子其祝我。』封人曰：『使君之年長於國家。』公曰：『善哉！子其復之。』封人曰：『使君壽皆若鄙人之年。』公曰：『善哉！子其復之。』封人曰：『使君無得罪於民。』公曰：『誠有鄙民得罪於君則可，安有君得罪於民者乎？』晏子對曰：『君過矣！敢問：桀紂，君誅乎？民誅乎？』公曰：『寡人過矣。』於是賜封人麥丘以為邑。」（33/188-89）

景公欲使楚巫致五帝以明德 晏子諫第十四

楚巫微導齋款以見景公，侍坐三日，景公說之。楚巫曰：「公、明神主之，帝王之君也。公即位有七年矣，事未大濟者，明神未至也。請致五帝，以明君德。」景公再拜稽首。楚巫曰：「請巡國郊以觀帝位。」至于牛山而不敢登，曰：「五帝之位，在于國南，請齋而後登之。」公命百官供齋具于楚巫之所，齋款視事。晏子聞之而見于公曰。……晏子曰：「……古者不慢行而繁祭，不輕身而恃巫。今政亂而行僻，而求五帝之明德也？棄賢而用巫，而求帝王之在身也？夫民不苟德，福不苟降，君之帝王，不亦難乎！……」（1/16b-17b）

《太平御覽·人事部九十七·諫諍六》：「楚巫微道襲款以見景公，侍坐三日，景公說之。楚巫曰：『公、明神之主，帝王之君也。公即位十有七年矣，事未大濟者，神明未至也。請致五帝，以明君德。』景公再拜稽首。楚巫曰：『請巡國郊以觀帝位。』至於牛山而不敢登，曰：『五帝之位，在於國南，請齋具而後登之。』公命百官供齋具，襲款視事。晏子聞之而見於公曰：『古者不慢行而繁祭，不輕身而恃巫。今政亂而行僻，◇◇◇◇◇◇◇◇？棄賢而用巫，◇帝王之在身也？◇◇◇◇◇◇◇◇而求帝王，不亦難乎！』」（456/8a）